



祭輓彙錄卷十九

祭文

維

康熙五十五年歲次丙申四月庚寅朔越祭日壬
辰愚叔繼突體乾有蛟愚兄應瑞愚弟得源五彩
時選五常時遴五雲五福愚姪欽登雲龍劍榮來
琮志灝劍祥王瑄王琨琦鎧祿雲麟鳴珂志孟鎧
祚志立宗榮愚再姪鴻運集熊勛集龍肇昇鴻立
廷弼桂懋之象廷贊鴻昇肇祝維森鴻安肇慶鳳
鳴愚再姪孫枝茂枝華枝蘭時鳴愚元姪孫燦灼
謹以瓣香束帛清酌庶饁之儀致祭於



皇清誥封光祿大夫內閣中書加十二級景原老姪之
靈前而言曰吾族生吾姪是祖宗之光也長幼卑
尊之幸也今吾姪棄吾族是祖宗之恫也長幼卑
尊之不幸也舉凡屬一體而分者雖千里百里之
外聞吾姪倏然棄世烏有不感而生哀哀而永慕
者哉第吾族人散處四方惟廟子灣口於明季時
尤爲極盛自滄桑以來漸就凋落強禦外侮往往
而有又賴有賢豪意氣者爲之維持而培植之得
以樂業無事則令此慕而生哀哀而益慕無論覲
面者聞聲者其悲於吾姪爲何如也憶愚方壯年
聞吾宗器識淵深才華駿發者必以吾姪爲首推

心焉慕之雅非一日未幾而壯遊邗上矣未幾而
起家鹽筴矣又未幾而身係兩淮之望出其碩畫
鴻猷以綏乂千商萬竈矣愚益幸廟灣去淮揚一
水可以溯洄從之不謂數十年來歲月因循竟阻
良晤也族衆自小溪來者僉曰列祖烝嘗之地幾
於棟圯垣頽今則烏革翬飛美輪美奐是惟吾姪
之力或又曰先世佳城兵燹莫考前人遺像湮沒
失傳今高塚巍然松楸有色舊容燦若卷軸如新
是惟吾姪之力或又曰某也新喪未窆而今且安
妥岡隴某也年長未婚而今且樂其家室是皆吾
姪之力愚聞而肅然起敬慨然增慕曰有是哉吾

姪義篤同宗惠逮數世寧獨淮海爲然哉夫有非常之德必有非常之福天之報施善人或及其身或及其子若孫其理昭昭有不爽者長子經士中翰摛詞蜚聲鳳閣次子書存分猷大郡譽重巖疆况乎邀

覃恩於四世膺一品之

褒封墓道焚黃家祠釋奠年踰七十強健聰明由此而耄耄而期頤若子若孫盡致顯榮以益增祖宗之光益慰長幼卑尊之望誰曰不宜奈何提福方隆而奄然即世我叔姪相慕之殷僅付神交向也聞聲而慕者今則聞訃而哀矣夫生而感慕慕且無

窮慕而生哀哀寧有底乎愚故追維往昔率弟姪再姪輩爲文以奠靈前庶鑒微忱悠然來思嗚呼哀哉尚

饗

維

康熙五十五年歲次丙申四月庚寅朔越祭日壬辰愚兄志發率男小姪其祥其位其祿謹以剛鬣柔毛清酌庶饗之儀致祭於

皇清誥封光祿大夫耐菴大弟之靈曰嗚呼人情最不能釋然無憾者其惟訣別之際乎况情連棣萼誼共荆枝數十年敦篤如一日者而一旦溘然訣別乎吾今日於弟誠有不能釋然於中者而涕泗滂沱幾有不知其然而然矣嗚呼幼當孱弱更值兵戈家道中頽四方戮力凡期所以奉甘旨兼以營家室也然而星月之淒涼幾經披戴風雨之漂搖

幾經櫛沐矣斯固余與弟同其境遇而同其勞瘁者也嗣荷先人垂蔭弟丕振淮揚余獲寧居江右雖關河間越而吾弟推心置腹不以修阻爲嫌余亦爲竭誠籌畫以副同懷乙酉之歲余因先慈苦節一生得荷

恩旨旌表遂回里建坊以諸務委之兒輩而吾弟栽培教育猶比情深迄今兒輩獲以成立而乏隕越之虞者咸吾弟維持之力也嗚呼里中伯仲亦多人矣惟余兩人交相契洽久而彌堅非余之愛敬於吾弟者實多吾弟之愛敬於余者不少也癸巳之年吾弟言歸故里山水怡懷晨昏暢叙墳笈之樂

莫盛於斯吾弟則篤念本源相營坵而封築伐石樹碣其爲孝也大加意宗祠捐囊橐而恢廓鬻田贍給其爲義也弘而且完子女之飄零多金是贖除石堤之障患千室以安其爲德也遠善雖小而必爲力凡周而不倦時或臨池揮灑字兼蘇米之長時或把卷吟哦句擅漢唐之麗方期聽雨以聯牀共叶池塘之春草乃吾弟以尚有未竟之謨再出淮揚益弘敷布期於急公以冀不負

聖天子南巡勤恤之溫語而後即安嗚呼悲哉痛哉不意臨歧相送之日遂成畢生永訣之會矣數十年敦篤之誼而一旦溘然其能釋然無憾哉自茲以

往不復見矣望蜀岡而灑淚血染啼鵲盼邗水以
招魂歌深楚些悵蓮峰之六六疇為同眺之人憶
鴻雁之雙雙忽作孤飛之影滌溪月冷水逝空回
巖嶺雲封人歸何處能不悲哉寧不痛哉所可慰
者吾弟之創垂有子孫以報効於

天朝吾弟之勲猷有碑銘以昭傳於奕禩生而無忝於
倫彛歿而有光於泉壤其亦可以翱翔於緱嶺之
上逍遙於蓬島之鄉矣獨是回憶當年恍如昨日
鵲鴿永歎何以為懷老淚潛然情實無能已已悲
哉痛哉靈其不爽魂兮歸來鑒此微忱哀哉尚
饗

維

康熙五十五年歲次丙申夏四月庚寅朔越三日
壬辰愚弟期日永率男制升士升階升發謹以辨
香束帛清酌庶饁之儀致祭於

皇清誥封光祿大夫景翁尊兄之靈曰嗚呼吾兄不獨
一族之望一鄉之望而實一國之望天下之望也
何為遽捐館舍溘焉長逝耶吾兄天挺竒才望隆
當世祖功宗德之所發祥黃山白嶽之所鍾秀當
少壯時以堂上春秋之高為甘旨之計棄括帖挾
齏筭客於維揚而家日昌大維揚之鹽課甲天下
五十年來督鹺御史更歷數十任而興利除弊弘

網細目惟吾兄是問吾兄之才經濟弘通兩淮推
爲第一不獨爲起家之本而於國計民生富庶之
盛與有功焉是以名聞海內誠達

九重有

御書之賜有克食之頒有三代之贈有一品之封

殊恩曠典所自來也其在鄉黨宗族善行懿德美不勝
書如修宗祠以報本追遠置義田以睦族周貧購
祖像而先代之音容儼在繪墳山而千秋之松柏
常新築石隄以保合族之廬舍修譜牒以聯百世
之宗支三黨賴其任卹交遊感其解推建滌溪書
堂復前賢之基構葺新安郡學振六邑之文風此

皆千百年不朽之功業夫積善之家必有餘慶所
以諸姪皆爲廊廟之器長則文章著於薇省仲則
事業顯於隴西叔季之間尤英姿挺發超邁等倫
而且孫曾繞膝俱負異才以爲吾族光寵者正寢
昌而寢盛也天之於善人其爲報施豈有爽哉前
歲吾兄歸里道經於杭觴酒晤言精神矍鑠固謂
必登期頤之上壽奈何竟棄人世凡在親交罔不
傷感而况予關手足之情誼能無泣下而欷歔聊
致蒿里之蕪詞痛泉臺之違隔嗚悲哀而莫知歎
百年於幻化而吾兄之盛德大業要自有其不朽
且孝子賢孫碩大蕃昌紆青縈紫佩玉鏘金食報

之靡窮榮於千載兄亦可含笑於九京矣嗚呼尚
饗

維

康熙五十五年歲次丙申四月庚寅朔越三日壬
辰愚弟道汝偕姪愚姪茂梓男愚姪茂桐茂楠謹
以瓣香束帛清酌庶饗之儀致奠於

皇清誥封光祿大夫內閣中書加十二級景原尊兄大
人之靈曰嗚呼吾兄今何往乎兄長余七齡自幼
德性過人有識者知其必亢吾宗及長而壯客遊
於維揚數十年間其崇祖敬宗入孝出弟贍族信
友諸大端固彰彰在人耳目亦何待弟之表述而
弟之所以不能已於言者蓋謂老年兄弟別日恒
多而聚日恒少乃一旦值此永訣能不悲雁行之

中斷而歎晨星之寥落耶吾兄每歸拜墓或一至
或一再至祀祖之餘與諸從兄弟握手言歡情殷
意篤猶依依如昨日事癸巳之秋復歸里門創建
新祠繕修祖廟置義田築大隄計工累萬初終罔
懈及甲午春正挂帆去邗吾輩祖道之時私相慶
曰吾兄身雖在歛而心無忘於在揚之子若孫者
蓋以齎務艱鉅紛至迭投必親為指畫而後即安
其精神矍鑠老猶不倦吾姪與男久侍几杖之側
教訓無異已出年來吾姪與男稍識世務又蒙裁
培於會計之中寧勞毋逸履安思危諄諄告誡面
命耳提余每於子姪家報中得聞此語足感吾兄

一本之愛為甚摯矣吾兄自處以廉存心以恕待
人之厚且寬遇事之灼識洞見善難盡述美不勝
書而其教子則又以嚴迄今諸姪筮仕

天朝廉明公慎而未仕者亦將次第搏飛孫枝濟濟一
堂悉老成練達迥邁等倫兩淮人士咸嘖嘖稱有
祖風焉邇來族中自廣陵來者必問吾兄之起居
安否聞吾兄靜處幽僻臨摹蘇米且以詩律詞章
排解襟懷往往高出唐賢每遇花晨月夕開尊嘯
傲一觴一詠與二三知己塵談忘倦不覺其年之
老余方謂具此豪興其臻耄耋期頤可操券得耳
無何偶爾違和遂有今日之變耶若早知吾兄遽

有此變胡不於前歲歸里之時追隨盡歡以暢吾老年友于之樂也耶言念及此能不令余望風而揮淚也哉雖然吾兄壽享七十有三春秋不為不高矣子喆孫賢名登仕版者有人望重鹽筴者有人式穀不為不似矣夫復何憾弟之所以不能已於言者則以吾兄僑居邗上病不及視殮不及含山川阻長情曷有極茲寄蕪詞遣姪與男代叩總惟靈如不遠庶葑菲是鑒乎嗚呼尚

饗

維

康熙五十五年歲次丙申夏四月庚寅朔越祭日壬辰愚弟暮辰姪起祥姪孫樹名樹成慎恒慎德慎言之純謹以瓣香束帛清酌庶羞之儀致祭於皇清誥封光祿大夫內閣中書加十二級景原尊兄之靈曰嗚呼惟萬物之終始兮識性命之歸旨嗟死生之契濶兮以天地為逆旅訃遠告而哀興兮春者為之罷杵望廟門而號叫兮驚梁木之忽圯託夙誼於厦蔭兮弔奚憚乎千里臨喪殯於未虞兮詎云見陳根而哭止緬本支於上世兮代不乏夫賢士獨吾兄之嶽降兮亢厥宗而特起文章既足

祭軒轅金卷之九
以華國兮經濟復侔於朝宁令聞交洽於公卿兮
措施利周於邦水仰君宗而如歸兮義匪市乎珠
履家風比隆於石奮兮孝謹尤推夫閭里篤行誼
而靡憊兮至德咸師乎郭李簪纓炳耀於後先兮
恭敬不忘乎桑梓新廟作而奕奕兮俾勿壞而鞏
峙籩豆薦其芬芳兮千秋昭乎裡祀購遺像以彰
祖德兮聯子姓而肅拜跪流長而知源遠兮孝思
興於筵几崇封樹以固牛眠兮丘隴擴其壇壝歲
時不懈於展祭兮奠九京而事死石埭築其縣巨
兮儼長虹之邈迤水患殺其瀾漫兮復千家於寧
宇置義田以賑乏兮撫一族而得所念婚姻之失

時兮贈兼金而續古延書香於不墜兮爰襄庇其
資斧聚後昆以勗絃誦兮再闢先賢之舊址凡前
人之有缺遺兮惟吾兄鉅細之咸補人有志而弗
逮兮輒慨忼獨肩而無委睦九族而敦懽洽兮心
必周乎遐邇好行其德而勿使知兮猶鳴響之在
邇嘉言懿行之孔昭兮衆志孚而莫名其美宜後
嗣之熾昌兮奕葉歌其麟趾天之報施不忒兮第
祿爾康而未已弟輩均藉餘光兮見人說項而榮
被况私淑乎典型兮競撫衷而自理方期用享大
耄兮長為合族之賴恃胡昊天之不恤兮遽奪吾
宗之君子痛吾兄之永隔兮高山頽而莫抵倚靈

祭事集錄卷六
凡而鬱陶兮嘆河清之難俟跪陳詞而進酒兮尚
希鑒茲哀誄嗚呼哀哉尚

饗

維

康熙五十五年歲次丙申夏四月庚寅朔越二日
辛卯愚弟總嘉復嘉禧姪立貴立功謹以剛鬣柔
毛清酌庶羞之儀致祭於

皇清誥封光祿大夫內閣中書加十二級景原尊兄之
靈曰嗚呼死生離別之感一聞之而悲從中來不
禁其涕泣沾襟此固人情之大常而獨至於骨肉
之感恩者則又有肫然不能自已焉夫人之情見
乎詞詞緣情而著也情之深者乃不自覺其詞之
切弟何敢爲文以弔吾兄乎然而情動於中不能
自已遂不得不託於言嗚呼吾兄素性孝友生而

穎悟每自命不凡族黨中盡以偉器目之嗜詩書
經史悉窮究其義蘊得旨而後快因急急於養親
未敢以文章二微祿乃棄舉子業業齟於揚及其
馳聲於大江南北愈抑然自下每不欲以賢智先
人而人自莫之及由是朋黨欽之當事重之

聖天子南巡駐蹕荷蒙光寵有老成持重之稱焉此非
獨揚郡之所推許即四方往來鉅公聞兄名者皆
願與折節恨相見之晚嗚呼是豈非其才其識超
越恒流者哉不寧惟是兄更誼篤於同宗情殷於
本族有弟則睦無兄不敬雖禮疎五服而義協一
家正如馬援於兒姪之間王華在弟兄之列者也

憶吾父之荷庇於兄也始自二十五年推心置腹
無所疑隱不幸吾父見背兄之視弟乃一如其手
足平居訓誨諄諄惟恐其不若人至墮家事故每
有請益兄則知無不言言無不盡時弟有至戚起
釁禍生不測幾至鵲巢鳩奪匍匐公庭賴兄之力
為之排解而弟始得蒙業而安前四十六年兄復
念吾父柩未歸里乃代為經營并先王父母共卜
葬於山嗚呼吾父生而為吾兄之所契死而為吾
兄之所葬澤一逮於先人恩猶存於身受骨肉之
間感恩何如今見其歿而能不為之感然悲憫然
痛耶嗚呼言有盡也情何已矣他如吾兄生平行

事種種姘修不可縷數是又必有蒙其惠者自戴之而自言之耳矣必弟之多為贅詞耶弟惟追憶夫始終相與之意朝夕聚首之懷痛吾父恨我生之不逢辰也感吾兄幸此身之有提挈也嗚呼已矣今乃不得復見吾兄矣心煩意亂莫知所云或亦搔首欷歔而叩天乎然而天之報施善人正不爽也即如今者諸姪輩仕則為良臣處則為俊傑以及芝蘭玉樹馥馥盈庭謂非吾兄之教育使然耶謂非天之報施於吾兄者獨見其厚耶則壽享古稀而榮膺

紫誥實吾兄必致之符耳特是弟之感慨懷思終無已

也見總帳之空垂望音容而若接思往昔其已悲撫時事而猶泣傷心哉辦香杯酒之忱不識吾兄其猶默鑒之乎如魂不遠來格來歆尚

饗

維

康熙五十五年歲次丙申夏四月庚寅朔越二日
辛卯總服弟嘉達總服姪立身立盛袒免姪立朝
立廷謹以剛鬣柔毛清酌庶羞之儀致祭於

皇清誥封光祿大夫內閣中書加十二級景原尊兄之
靈曰嗚呼老成凋謝哲人云亡即在凡人猶且歎
歎感泣而况序屬弟兄情關叔姪一旦幽明頓隔
其曷能已於悲痛乎弟嘉達碌碌庸材弗克自振
先君移家廣陵吾兄推一本同氣之誼多方代圖
恒業又不以達為不肖時時進而教之溫言笑語
藹若春風終歲之需恃以無缺姪立身等迂拙自

守毫無寸長更蒙扶植十餘年來資生有賴內顧無憂非吾兄提攜指示之力何以致此達等清夜撫心深愧捐埃未報惟冀岡陵永固少慰私懷去冬動履維艱而強飲善飯矍鑠自喜竊謂期頤上壽不難漸臻孰意入春以後時抱微疴節過清明病勢轉劇姪立身在里聞信遑遽回揚舟次吳門心神恍惚如有所失星夜馳視而吾兄已在彌留之際聞立身近榻呼名猶淒然嗚咽不能他語其臨終愛姪之情至於如此能不痛於心耶想吾兄精神強固年逾古稀壽不可謂不高矣榮膺紫誥晉階一品秩不可謂不尊矣諸姪策名清時馳聲

中外孫曾崢嶸倜儻濟濟滿堂福不可謂不全矣然則吾兄乘彼白雲逍遙於十洲三島復何所遺憾哉至於鴻才偉績懿行嘉言當代名公鉅卿自能闡揚用垂不朽達等固陋無文不敢具述獨是素荷栽培遽罹永別登其堂如聞警效披其帷莫覩儀容悲從中來不禁淚沾胸臆也敬陳薄奠併述悃誠靈其不昧來鑒來歆嗚呼尚

饗

維

康熙五十五年歲次丙申夏四月庚寅朔越二日

辛卯功服弟嘉琳嘉珩功服姪立學在制功姪立
登總服姪孫道隴謹以瓣香束帛之儀致祭於

皇清誥封光祿大夫內閣中書加十二級景原尊兄之
靈曰嗚呼兄弟關乎手足未有手足傷而心不痛
者况乎髫齡恩育老而弗忘聚首終年歡如一日
今一旦見吾兄之奄然長逝也能不爲之仰天歎
息而椎心飲泣也耶吾家歛南桂溪鴈序多人求
其英姿卓越表表人群者惟吾兄一人而已嗟乎
吾兄之才足以扶衰救敝吾兄之德足以輔世長

民雖未獲登仕版立廟廊而紀其生平偉烈多爲士大夫所欽慕至於鄉閭族黨之間推食解衣吾兄俱視爲一體然以言夫甘苦與同維持調護至於數十年而不倦從未有如弟姪輩之親切者也吾父生弟輩十人父爲諸生家鮮遺蓄又遭山賊竊發甲寅乙卯之變俱散於四方皇皇餬口之不暇幸得吾兄手創鹺業大振家聲自是弟兄叔姪俱得相依爲命吾兄更篤於手足之誼復爲因材施教擇能任使婚者婚娶者娶歲時伏臘相聚一堂非叨吾兄之福庇何以有此嗚呼兄之孝可以光大業兄之慈可以裕後昆兄之友愛可以厚兄

弟固宜其積有餘慶而壽考無疆胡爲長往不顧也耶嗚呼吾兄年踰古稀五福全備其亦可以無憾特是弟輩十人前後無祿已去其八今垂暮之弟兄忽又生死岐途每一念及覺四顧茫茫不識此身之何託也姪立登幼失怙恃零丁孤苦凡先人殞殮之具移柩之資舉家饗飧之費一惟吾兄是賴今三月間不幸生母去世苦凶之際方恨此生之不辰然猶依藉於吾兄以奉教不料吾兄又忽然長逝則是立登之痛吾兄更痛於喪父喪母而朝夕悲思無異於抱恨終天也薄陳一奠泣下沾襟魂如不遠來格來歆哀哉尚

饗

維

康熙五十五年歲次丙申孟夏月庚寅朔越二日
辛卯功服姪立成立聖立魁立名總服姪孫道昫
謹以辨香束帛之儀致祭於

皇清誥封光祿大夫內閣中書加十二級景原伯父之
靈曰嗚呼吾伯父竟棄立成等而長逝哉立成等
魂驚魄悸涕淚滂沱復何言哉而有不忍不言者
伯父與吾父為同堂昆弟吾父卒於江南時立成
年纔十歲立聖七歲立魁四歲若立名懷娠母腹
閱四月始生耳貌孤煢煢宗族莫憐吾母節矢柏
舟茹荼飲檠顧此旅櫬他鄉歸窆何日傷慈母之

心吾伯父惻然動念爲吾父移柩家山卜吉安厝
凡附棺之物備具無遺其撫循姪輩不僅猶子也
而視若親生初携立成來揚延師督課課餘則命
侍立左右提命諄諄逮立聖立名口能句讀亦相
繼携來就學提命如前且念吾母獨居異地舉目
誰親亟命立聖渡江迎養又爲吾兄弟次第完姻
俾晨昏菽水中饋有人吾母得少休勞動者伯父
之賜也惟立魁幼嬰痼疾舉動失常猶時爲延醫
診治不以其病廢而置度外伯父繫情手足加惠
諸孤洵仁至義盡哉今姪等稍知貿易伯父乘間
試以他事差能勝任未嘗不靦然色喜謂能承其

志也三月朔日立成辭往廟灣離伯父尊前曾無
幾時而方寸戀戀常依座隅立聖久客西江已踰
兩載屢奉遺書訓誡而旦夕承顏頃刻弗離者惟
立名一人先是立成等接到音書知伯父飲食如
常精神未改雖行步蹒跚謂可無憂意外孰意昊
天不弔吾伯父竟棄姪等而長逝哉聞信奔歸音
容莫覩能不痛哉尤可痛者吾母守志撫孤伯父
恒加欽重嘗語立成等曰汝母苦節清操應邀
旌典惜年未六十與例猶未相符他日力請當事題奏
褒榮以慰厥志以耀吾宗吾必爲汝圖之今言猶在耳
而伯父長往不返表揚苦節知何日耶嗚呼吾伯

父視姪如子備極教養之恩姪未得視伯如父少
報烏銜之哺自茲以往惟與諸兄諸姪義篤恩聯
始終如一亦可慰在天之靈爽矣長跼陳詞望神
鑒格嗚呼尚

饗

維

康熙五十五年歲次丙申夏四月庚寅朔越三日
壬辰愚姪習軻瑗麟宣再姪華葦一儀世振宸文
持謹以剛鬣柔毛清酌庶饁之儀致祭於

皇清誥封光祿大夫內閣中書加十二級景原尊叔之
靈曰嗚呼維公翕闢資華氤氳降秀謫自清都誕
於華胄行著一鄉聲施九有世奉準繩人推領袖
追維綺歲早獵名場胸羅掌故筆妙詞章潘江陸
海宋艷班香學優射策技必穿揚昔我遠祖在淳
熙季與朱紫陽同登進士數百年來蟬聯科第世
德相承公應繼起才高未達道泰時屯衝風塌翼

逆浪瀨鱗矧當家落何以娛親欲謀甘旨乃急治
生淮海維揚公狂流寓暫屈持籌即優心計四通
居陶千金累致如彼少康中興夏旅殖業旣盛奉
養斯隆楚萊戲綵曾子釜鍾承歡繞膝情若嬰童
百城圖畫至行可風愛日方殷春暉易暮皐魚泣
血王褒廬墓當其躡踊感動行路至於終身猶有
餘慕情惟報本禮在奉先爰緝祠宇榱桷歸然復
念遠祖兆域變遷重爲封植望若新阡伐石樹碣
永表千年河潤三里澤及九族勗置義田收恤煢
獨凶喪婚嫁量資錢粟更擇秀良居之家塾勉以
詩書人皆自淑恩推自出誼重渭陽保其廬舍餼

廩是將若敖弗祀惻焉心傷爰謀立後繼彼烝嘗
凡諸經紀必計久長以公一身克兼百行數厥才
猷尤彰令聞上自公卿訖於列郡或賁干旌式廬
造請或奉盤敦願聞緒論往聞齎筴凋敝方深恭
逢

法駕來展

時巡公爲條奏幸沐

殊恩緩征借帑衆業寢興

宸書賜賚光耀門庭天鑒陰功公受賜策人佩銀黃門
盈祭戟金紫一品家風萬石丘壑夔龍耆英劉白
尚茂神明未凋齒髮已備五福宜享百齡胡爲厭

世溘焉上征列仙註籍高居墉城孝子號慟幾致
毀生素卓千里會者萬人矧我族子尤蒙卯翼訓
誨猶新老成遽失或在鄉山或侍几席一罹凶變
同聲兩泣何以訓德敢藉誅筆嗚呼難留者形不
朽者名公之盛業被於無垠上諸惇史永垂汗青
采其獨行合入儒林繼志述事况有後昆有蔬載
芼有醴薦清公其下降來格來歆嗚呼哀哉尚

饗

維

康熙五十五年歲次丙申夏四月庚寅朔越二日
辛卯姪士衍肇陽謹以瓣香束帛之儀致祭於
皇清誥封光祿大夫內閣中書加十二級景原尊叔大
人之靈曰嗚呼自我叔之生也非惟一家之慶而
實係邦之榮懷我叔之亡也非惟一家之悲實係
邦之殄瘁夫以一人之身所係若此是以捐館之
日上自駐節泣維揚者各郡之縉紳士大夫下而
至於販夫販婦聞之莫不欷歔感泣以爲一老之
不遺爲可惜此非才德顯於衆利澤施於物而曷
以令人思慕若是而况吾宗人也哉而况行也哉

我叔殆非一代才也具經綸雄偉之略肩任艱鉅
不震不撓遇事之紛而不能決者輒以片言斷之
無不人人厭塞齟務之敝由來已數十年自吾叔
網紀其事利舉弊除公私咸賴凡當事欲有所興
革者必諮我叔前後所裨益者甚衆是以上年

鑾輿南幸屢奉

召對

特賜殊恩崇階極秩可謂光寵吾門矣毋亦其積之有
本而致之有由耶吾家世有積德是以覃生吾叔
而又滋培而光大之素性好施曾無吝色歲荒人
飢減橐以賑所全活者數千人其他有利於物者

為之惟恐不及而於宗誼尤篤焉祠宇傾圮則獨
任脩治買田供祀則竭力以從族中老者敬而事
之少者塾以教之貧而無居乏食則贖產給粟以
收之力不能葬埋嫁娶者則予之貲而助之所以
恤宗睦族措置咸宜者其事未易更僕數嗚呼懿
德如是宜乎存亡之際人人為之感慨而悲思而
屬在一本者尤痛徹心脾涕洟洟不自禁也然而
天之所以報我叔者亦云厚矣年踰古稀爵躋隆
品父子呼嘯孫曾玉立而吾弟諸英必皆歷臺閣
持節鉞以樹勲當世以竟吾叔未竟之業亦可含
笑九京矣敬具薄奠縮酒斯馨風迴雲止來格來

歆嗚呼尚

饗

維

康熙五十五年歲次丙申夏四月庚寅朔越二日
辛卯姪來徵來玉正琬再姪璧謹以辨香束帛之
儀致祭於

皇清誥封光祿大夫內閣中書加十二級景翁尊叔大
人之靈曰蓋聞國將興必生名世家道盛必產偉
人此古今不易之理也吾族系出新安簪纓閥閱
代不乏人但族廣人稠其挾策而寓居四方者寔
繁有徒而淮揚尤盛吾叔髫年負偉抱尋章摘句
所不屑爲因嘆曰大丈夫終身牖下特醢雞之翔
於甕中耳安能鬱鬱久居此乎於是棄儒業至廣

陵從事齶務不憚勤勞夙興夜寐歲供國家以數百萬

天子嘉之曰能錫以龍文頒以克食寵遇非常凡海內之名公巨卿無不知有吾叔其人殷勤下交贈縞報紵又不止座客常滿樽酒不空已也且吾叔好施與遇友朋急難不惜麥舟之助以視世之交友者平日無事以聲氣相往來忽而變起非常即去之惟恐不速甚至不一引手反下石者其賢不肖相去何如也至於吾族黨之寓居維揚者不啻數千人吾叔念木本水源凡冠婚喪祭歲時伏臘以及力之所不能勝事之所不能為者無不諮諏遍

訪解囊以助之盡力以扶之故所全實多語云本固者枝必茂源遠者流自長吾叔才全德備者宜篤生令嗣故吾諸兄弟皆金馬玉堂之器拖青紆紫食祿

天家而諸姪孫輩又皆芸閣傳經文成夙慧芹香泮水藻采繽紛萃五福於一身聚四世為一堂則所以富國而興家者舍吾叔其誰與歸天之報施豈偶然哉今當七旬又三溘焉長逝吾族黨不勝悲悼第廟溪距揚五百餘里不及視殮深以為憾薄具澗水溪毛躬親一奠吾叔有靈尚其來格來歆尚饗

維

康熙五十五年歲次丙申夏四月庚寅朔越三日
壬辰愚姪錫朋錫祚偕男姪孫琨璿瑛琰謹以
辦香束帛之儀致祭於

皇清誥封光祿大夫內閣中書加十二級景翁叔父之
靈曰朋兄弟幼侍先君子受毛詩句讀至行葦旣
醉之篇輒躍然起掩卷而請曰古人之厚於其宗
族固若此乎行道之葦方敦然而即戒牛羊之踐
履推此心以厚宗族其仁愛寧有止極旣醉之卒
章則曰君子萬年又曰釐爾女士從以孫子因以
知篤於親者其食報必篤雖一時酌答禱頌之詞

亦理所必然可操券得也嗚呼乃今於公見之矣
公之獲諸先祖遺像也令高手臨摹成軸每逢歲
始懸之中堂聚族之僑於揚者羅拜如祠祀之禮
飲福盡歡鼓吹交作公於其時笑語卒獲與古之
肆筵設席者何以異注念粉榆戒朋輩有生計必
速歸毋戀客土爲歛居萬山之間而小溪與浙之
遂安僅限一嶺有明中葉至崇禎之季居如鱗次
號爲最盛申酉之際山賊乘間竊發小溪獨承其
亂至甲寅再罹兵火幾不復舊觀矣公覩之愀然
曰室廬如是田園如是是將使土著者有輕去其
鄉之思而流離遷徙之人不懷首丘予之責也於

是語有力者令其更新其無力而不能自存者每
厚予之值曲爲保護迄於今里閭相望煙火日增
鬱鬱蔥蔥漸復於前明之繁盛謂非公之力不及
此公之於子姪輩也量才而器使之每多端容隱
不樂數言其過故以愚弟與兄之不能其在公并
包中久矣方日誦賓筵不忘振刷豈意公遽乘白
雲至帝鄉也嗚呼公於宗族有行葦之愛宜乎介
福萬年如旣醉之所頌禱而竟奄然即世耶諸兄
弟姪文章仕宦增輝鄉黨公旣膺

榮誥於生前必獲

盛典於身後庶幾如詩之所云從以孫子者然則公之

食報方未有艾也獨是朋兄弟素辱栽培未或一
當今茲春首禮祖像見公之跪拜猶如常時陪侍
飲福見公之舉酬逸逸言歡竟席竊以為大年有
徵而朋兄弟尚思鼓勵於萬一孰謂以是竟成永
別哉老成云亡典型猶在此所以仰瞻几筵不禁
涕泗縱橫也尚
饗

維

康熙五十五年歲次丙申夏四月庚寅朔越祭日
壬辰愚姪超率男姪孫昱暹昂晟謹以瓣香束帛
清酌庶羞之儀致祭於

皇清誥封光祿大夫內閣中書加十二級景原叔父之
靈曰嗚呼公今長往矣聞訃之日哀動閭巷婦人
孺子莫不欷歔感泣以為公雖德福並至壽踰古
稀而猶願公登期願享長年之慶於無窮也况於
超者族之猶子投分最深而謂能已於情乎憶先
府君之僑居茲土也與公實相後先公與先府君
相契結往還無間超自為兒時戲先府君側公見

輒蒙器注稍長能屬文先府君每令超出請教益
公喜動顏色期許切至超竊愧自委棄迄今蹭蹬
無所成就而公尚企望不倦嗚呼公今長往矣廣
陵南北都會族之宦遊者服賈者恒往來於是因
而家者有焉五十年來恒奉公爲依歸公維持之
必盡力今夫以族黨所倚賴之人當其生存事不
諮而代爲謀難不告而代爲解積日累月視若故
常一旦溘然而逝與衆長辭雖令子賢孫繼志述
事盡善盡美而當此之時老成頓亡稟承無自追
念疇昔悲從中來然則如公者感悼之私知不獨
超一人已也公寬中無城府而尤樂愛讀書迂疎

之士故雖以超之庸陋兩蒙館穀皆以不克勝任
告歸而公不以爲忤守拙食貧兒子輩多至廢書
長男昱公特左提右挈不遺餘力且重念儒家子
恐不諳世務有事必曲譬令曉躬爲率先十數年
如一日此非至情篤愛亦烏能委曲周詳若此之
甚者乎季男曷與學使胡公試已得復失公爲之
歎息彌旬客冬學使按臨徽郡也公慤懃慰勉治
饌勸往曰微吾故土也不猶愈於寄籍乎且解橐
以任行李之費凡所以獎掖讀書後進皆如此類
也嗚呼孰謂公竟長往乎公之聲名達於

九重事業在於兩淮光前裕後爲族偉人固人人能詳

爲稱道令子賢孫克孝克誠文章仕宦又自有所
以不朽其親者超不敢隨世俗爲諛詞獨念公之
於超三世篤愛深情古道所以一矢口而淚即涔
涔然不能止也尚

饗

維

康熙五十五年歲次丙申夏四月庚寅朔越祭日
壬辰愚姪志儼率男之瑩姪孫德修率男珩謹以
瓣香束帛清酌庶饗之儀致祭於

皇清誥封光祿大夫內閣中書加十二級景翁尊叔之
靈前而言曰嗚呼尊叔固吾族所共仰爲山斗者
也奈何一旦駕箕尾而歸天上耶姪等忝列宗親
久隨杖履忽焉長辭能無感泣尊叔幼而嗜學爲
文舉筆千言試輒冠軍父師咸以大器目之謂以
制藝取功名直指顧間事耳第叔祖得子最晚尊
叔性純孝嘗蹙然曰高堂有白首之親人子不能

備雞豚之奉徒汨沒於章句以博升斗吾親春秋
高恐不及待也乃棄制舉遊揚郡從事齏務要亦
為親謀甘旨孝子竭力耕田之志耳迄今閱數十
年前後齏使敬禮殊常群奉為長城迨
天子鑾輿南巡尊叔以碩畫竒猷具本條奏裕國甦商
之略獲覲

天顏為同儕貸內帑緩帶徵減加勛凡業齏之家無不
被其蔭尊叔一歸其恩於

天子上其功於當事深自謙抑不伐其能尊叔才識非
常不超乎風塵儕偶之上歟若其厚德躬行正非
輓近所可及者也吾見今之擁厚貲以自雄者夥

矣宮室宴樂結納酬酢而外絕不經心至於祖墓
宗祠族人戚黨未見其拳拳於衷分我餘力以及
之者惟我尊叔不事澆漓篤意根本故山塋壙逐
一修築以傳久遠繕葺宗祠以續高曾創始之志
特建新祠以專祀其先其報本序倫之禮無不盡
也勤訪列祖之容重構滌溪之室築石堤以安瀾
修黌宮以育秀族之子姓婚喪有資貧乏必給三
黨姻婭雖等級有差無不體恤備至以姪等樗材
陋質深荷垂青志儼來邗一謁即蒙提拔德修承
委館政亦叨遊廣陵泮宮要皆賴尊叔之玉成也
况於吾族向學者悉資膏火貿易者樂為引援又

不一而足乎宜歌功頌德者遠近如一轍也且尊
叔生平然諾不欺服物以方正容人以大度方之
季子彥方婁師德諸君子寧謂古今人不相及哉
今年逾七袞長君次君驤首

皇路內則綸綍祗承外則軍民攸賴叔季又各抱英才
奮翼天池諸孫森森玉立不啻瑜珥瑤環之滿庭
階也正宜高堂欣慶奈何乘箕尾而歸天上耶姪
等夙受栽培茲當哲人既萎能不涕零也哉薄具
酒漿濡墨申忱神其來格尚

饗

維

康熙五十五年歲次丙申孟夏月庚寅朔越祭日
己亥愚姪循良率男承恩謹以瓣香束帛清酌庶
饗之儀致祭於

皇清誥封光祿大夫耐菴尊叔大人之靈前而言曰嗚
呼人生有三不朽立德立功立言此三者足以顯
於當時而垂諸後世其人雖往其事愈傳不與形
骸而俱逝不與歲月而俱遷古人云雖死之日猶
生之年蓋謂此也尊叔之壽已邁古稀其得天不
爲不厚矣然世之永年者亦復不少故壽不足爲
尊叔重或曰其生也榮封階一品上逮其先斯亦

極人世之殊遇矣然家聲通顯矜貂蟬簪紱之烜
赫者何代無之故寵榮亦不足爲尊叔異或又曰
哲嗣登朝後先鵲起孫曾繩武奕世濟美此又慶
澤之貽於來茲爲永膺多福者也然古今來子姓
之賢而貴盛者史不絕書世亦恒有故蕃衍猶不
足爲尊叔竒惟是尊叔之大德首在於孝友而釜
鍾養志以事生葬祭盡禮以事死推仁愛於羣從
不啻一本之所生置義田以贍貧乏資膏火以勵
苦學且推所自出以及於外家保虔劉之廬墓延
旣絕之宗祧此其尤大彰明較著者也尊叔之不
朽者其一至若籌齋之邀

恩於免贏餘減加勸貸

內帑緩帶徵則尊叔勞瘁之功在兩淮考索遠祖兆域
樹碣繪圖昭示久遠繕葺宗祠固其基構規制崇
弘視昔有加更創新祠以享祖禰購求先世遺像
徧乞名公鉅卿爲之題贊改作滌溪學舍誘我秀
良皆進德修業更築石隄永爲保障俾千室奠安
覩郡學圯廢捐貲倡率庀材落成宮牆俎豆煥然
重光則尊叔興復之功在故鄉而不朽者又其一
尊叔舞象之年遊學武林受教於名師益友爲文
敏如宿構輒驚其同學皆退避三舍及歸累試冠
軍此言之立於制義如錦繡如珠璣者也厥後運

卷之六
畫齋策發議洞中肯綮與當代宗工酬酢暨歷任
齋使垂意諮諏者悉條分縷悉應荅如流咸加茹
納值

聖駕南巡同輩首推具本叩陳覲

天顏於高旻寺

褒賜御書此言之立於幹濟者也而平日長謠短咏陶
寫性靈則其言之緒餘耳此不朽者又其一嗚呼
具此三不朽其所以流傳於後者豈可以世數計
哉豈復有所不足而顧爲之咨嗟悼歎哉宜其易
簣之時以曾無一事應外兄程君之叩也雖然姪
於尊叔大人前此天各一方惟是二十年來甫獲

款通情愫乙未春有山左之役道經廣陵與尊叔
數共晨夕及冬初南旋復奉起居於邗上遂以督
修郡學相委任今春辱寄手書訂期夏初歸里共
圖襄事詎意不踰旬朔而即驚聞訃音耶嗚呼姪
欲匍匐臨哭躬酌椒醑猥以董事方殷不能奮飛
遙將束帛侑以此詞質言無文意在述哀惟我尊
叔降鑒而歆之嗚呼尚

饗

祭輓彙錄卷十九



